

ՎԻՄԱԳՐԱԿԱՆ

ՎԻՄԱԳՐԱԳԻՏԱԿԱՆ ԱԿՆԱՐԿՆԵՐ ԽՈՐԱՆԱՀԱՄԻ ՎԱՆՔԻՅ¹

13-րդ դարը, որպէս միջնադարեան Արցախի քաղաքական, հոգեւոր ու մշակութային վերելքի մի ժամանակաշրջան, նշանաւորուել է նաեւ բազմաթիւ վանքերի ու եկեղեցիների կառուցմամբ:

Մեր յօդուածի քննութեան առարկան է խորանաշատի վանքն՝ իր պատմութեամբ, վիմագրերով ու ձեռագրերով: Փորձ է արւում նորայայտ վիմագրերի ու ձեռագիր նիւթի համագրմամբ լուսաբանել խորանաշատի պատմութեան որոշ էջեր, որոնք յատկապէս հրատապ են ատրպէյճանական բանակի կողմից վանքի պարբերաբար հրետակոծման եւ տեղի վիմագրերին սպառնացող ամենօրեայ վտանգի պայմաններում:

Խորանաշատի վանքը գտնւում է Փառխոսի գաւառում, Զինարի գիւղից 2 կմ դէպի հիւսիս արեւելք ընկած բարձրադիր ձորակում՝ ըստ Կ. Ղաֆադարեանի պատկերաւոր արտայայտութեան²: Այդ խոշոր գրչութեան կեդրոնի ու վարդապետարանի հիմնադիրն է համարւում Վանական Վարդապետ Տաւուշեցին (1181-1251 թթ.): Ըստ յայտնի աղբիւրների՝ Մխիթար Գոշի աշակերտ Վանական Վարդապետը, վարդապետ օժտուելով (1207 թ.), իր ծննդավայր Տաւուշ գիւղի մօտակայքում հիմնել է խորանաշատ վանքը՝ իշխան Վահրամ Գ. Գագեցու հովանաւորմամբ, եւ դարձել առաջին վանահայրն ու ուսուցչապետը³: Պէտք է կարծել, որ վանքի անուանումը, շատ խորաններ ունեցող կամ էլ խորանակերտ, կնքուել է հէնց Վանականի կողմից:

Այստեղ սովորել են այնպիսի գիտնական-աստուածաբաններ, ինչպիսիք են Կիրակոս Գանձակեցին, Վարդան Արեւելցին, Գրիգոր Ակներցին, Առաքելը, Ստեփանոս Աղթամարցին, Արտազի առաջնորդ ու նշանաւոր աստուածաբան Յովսէփ Վարդապետը, Խաչէնի քաղաքական կեանքում մեծ ազդեցութիւն ունեցող Մարկոս Վարդապետը, մեծահռչակ

¹ Սոյն հաղորդումը պատրաստուել էր որպէս զեկուցում՝ ներկայացնելու համար ՀՀ ԳԱԱ Արեւելագիտութեան ինստիտուտի կազմակերպած «Հայաստանը եւ արեւելա-ֆրիստոնէական քաղաքակրթութիւնը» գիտաժողովին (2016 թ.): Մի ցաւալի թիրիմացութիւն՝ համակարգչիս մէջ եղել է նման վերնագրերով երկու փաստաթուղթ, մէկը՝ հատուած Թ. Մինասեանի գրքից (Թ. Մինասեան, Արցախի գրչութեան կենտրոնները, Երեւան, 2015), միւսը՝ զեկուցման նիւթը: Գիտաժողովի կազմ-կոմիտէին սխալմամբ ուղարկել եմ Թ. Մինասեանի գրքի հատուածը, եւ այն թիրմացաբար տպագրուել է: Կատարուածի համար ներողատուութիւն եմ հայցում կազմակերպիչներից, մասնաւորապէս պ.գ.դ. Ալեքսան Յակոբեանից, Թ. Մինասեանից եւ ընթերցողներից: Շնորհակալութիւն եմ յայտնում «Սիոն»-ի խմբագրական կազմին՝ թիրիմացութեան շտկման նպատակով բուն զեկուցումն տպագրելու համար:

² Կ. Ղաֆադարեան, էջեր Հայոց միջնադարեան մշակոյթի եւ պատմութեան, Երեւան, 2007, էջ 279:

³ Խորանաշատի վանքի, վանքում արտագրուած ձեռագրերի ու Վանական Վարդապետի կենսագրութեան մասին աւելի մանրամասն տե՛ս Կիրակոս Գանձակեցի, Պատմութիւն Հայոց, աշխատ. Կ. Մելիք-Օհանջանեանի, Երեւան, 1961, էջ 243-252 (Գլուխ ԻԴ. Վասն գերութեան վարդապետին Վանականայ եւ որոց ընդ նա), Հ. Ոսկեան, Յովհաննէս վանական եւ իւր դպրոցը, Վիեննա, 1922, էջ 1-122, Լ. Խաչիկեան, «Յաղագս տարեմտին ի Վանական վարդապետէ ասացեալ», ԲՄ, թիւ 1, 1941, էջ 151-169, Գրիգոր Վրդ. Ակներցի, Պատմութիւն քաթարաց, Երուսաղէմ, 1974, էջ 23, 27, 36:

փրկիսոփայ Սոսթենէսը, «Վարք Սրբոցի» կազմող ու խմբագիր, ներքին հաշէնի եպիսկոպոս Իսրայէլը, Գրիգոր Աղթամարցիին եւ այլք:

Խորանաշատի վանքում գրուած ձեռագրերից Մատենադարանում են պահպանւում №№ 1563, 2101, 2273, 3536, 5601, 5452, 6106, 6669, 8882⁴: Գիտական կարեւոր նշանակութիւն ունի մասնաւորապէս Մաշտոցեան Մատենադարանի Խորանաշատում 1223 թ. ընդօրինակուած № 2101 ձեռագիրը: Այս ձեռագրի ուսումնասիրութեամբ զբաղուել է Ն. Մառը, ով, համեմատելով այդ ձեռագիրը Շատբերդի վրացերէն մի ձեռագրի հետ, եզրայանգել է, որ վրացական ձեռագիրը թարգմանութիւնն է Խորանաշատի № 2101 ձեռագրի⁵:

Վանականի անունը յաճախ է հանդիպում Խորանաշատի վանքի գրիչների յիշատակարաններում: Օրինակ՝ ՄՄ 1563-ի Մարտիրոս գրիչը այն անուանում է Վանական Վարդապետի վանք. «Ի վանս Վանական Վարդապետի, առաջնորդ գոլով Պետրոս Վարդապետի, ձեռամբ Մարտիրոսի բազմամեղ ծառայի, ի ծերութեան ժամանակի...»⁶:

Խորանաշատի վանքի պատմութեան լուսաբանման մէջ կարեւոր դեր ունեն նաեւ վիճաբերը, որոնցով զբաղուել են վիճաբարագէտներ Ս. Բարխուդարեանը, Կ. Ղաֆաղարեանը, Ս. Սաղումեանը: 2007 թ. յետմահու լոյս տեսաւ Կ. Ղաֆաղարեանի «Էջեր Հայոց միջնադարեան մշակոյթի եւ պատմութեան» աշխատութիւնը, որտեղ հրատարակուեցին Խորանաշատի վանքի 33 արձանագրութիւններ: Վերջերս մենք նոյնպէս այցելեցինք թշնամութիրախ դարձած Խորանաշատի վանքը, որտեղ լուսանկարեցինք բոլոր արձանագրութիւնները: Համեմատելով լուսանկարները Կ. Ղաֆաղարեանի վերծանութիւնների հետ՝ գտանք որոշակի տարբերեցումներ: Այսպէս տարբերեցում կայ հետեւեալ արձանագրութիւնների մէջ.

1. Ժամատան արեւմտեան պատի վրայ ագուցուած խաչքարին կարդում ենք.

ԹՎԻՆ՝ ԶԲ (1253): ԵՐԿԻՐ ՊԱԳԱՆԷՔ / ՅԱՂԱԽԹՍ ՅԻՇԵՍՋԻՔ:

Կ. Ղաֆաղարեանի ընթերցած արձանագրութեան սկզբում⁷ առկայ եւս երեք տառերը՝ //ՆԻՅ (նկ. 1), այլեւս չեն նշմարուում:

2. Տաճարի արեւելեան պատի վրայ, դրսից կարդում ենք (նկ. 2).

ՅԱՆՈՒՆ ԱԾ, ԵՍ ԳՐԻԳՈՐ, ՈՐԳԻ ՎԱՍԱԿԱ ՄԻՋՆԱՇԻՆԵՑԻՆ⁸, ԳՆԵՅ/Ի ԶԿԱԽՇՔԱԿԱՐԱՆՑ ԵԻ ՏՎԱՔ Ի ՄԲ ԱԾԱԾԻՆՍ ԽՈՐԱՆԱՇԱՏՈ: / ՎԱՐԴԱՊԵՏՍ ՀԱՍՏԱՏԵՅ ՄԵԶ :Բ: ՊԱՏԱՐԱԳ ՏԱԻԻ ՀՈԳՈՅՆ ԳԱԼԸ/ՍՏԵԱՆՆ ...:

⁴ Տե՛ս Յուզակ Ձեռագրաց Մաշտոցի անուան Մատենադարանի, հ. Ա., կազմեցին՝ Օ. Եզանեան, Ա. Զէյթունեան, Փ. Անթաթեան, Երեւան, 1965, Յուզակ Ձեռագրաց Մաշտոցի անուան Մատենադարանի, հ. Բ., կազմեցին՝ Օ. Եզանեան, Ա. Զէյթունեան, Փ. Անթաթեան, Երեւան, 1970:

⁵ Տե՛ս Գ. Մուրատեան, «Բարոյախօս (Physiologus). Հայերէն խմբագրութիւններ», Բանբեր Մատենադարանի, հմր. 22, Երեւան, 2016, էջ 291-330:

⁶ Մայր Յուզակ հայերէն Ձեռագրաց Մաշտոցի անուան Մատենադարանի, հ. Ե., կազմեց՝ Օ. Եզանեան, Երեւան 2009, էջ 484:

⁷ Կ. Ղաֆաղարեան, Էջեր Հայոց միջնադարեան մշակոյթի եւ պատմութեան, էջ 281:

⁸ Միջնաշէն – գիւղատեղ ՀՀ Տաւուշի մարզում (յուշառձանի № 10.22.3)


4. Ղաֆաղարեանի մօտ «ԶԿԱԽՇՔԱԿԱՐԱՆՅ» բառը վերծանուած է «ԶԿԱԽՇ-
ՔԱՐԱՆՅ», իսկ «ՏԱԻԻ» բառը «ՏԱԻՆԻ», ինչը ընթերցողի ուղղման արդիւնք է։
«ԶԿԱԽՇՔԱԿԱՐԱՆՅ» ասելով, հաւանաբար, նուիրատուն նկատի է ունեցել որեւէ
հանդամաս կամ այլ անշարժ գոյք, որը նա գնել է Կոշկակարանց տոհմից (Յա-
ճախ տոհմանունները ձեռք էին բերուում համապատասխան այդ տոհմի մասնա-
գիտական գործունէութեան։ Հաւանաբար, Կոշկակարանց տոհմը զբաղուում էր
կոշկակարութեամբ) ու նուիրել վանքին։

Յատկապէս կարեւոր են Ս. Բարխուդարեանի արխիւից մեզ հասած Խորանաշատի
լուսանկարները⁹։ Այդ լուսանկարներից մի քանիսը ստացել են սկզբնաղբիւրի նշանա-
կութիւն, քանի որ դրանցում արտացոլուած արձանագրութիւնները, հաւանական հրետա-
կոծութեան հետեւանքով, չեն պահպանուել, մասնաւորապէս չորս արձանագրութիւն (նկ.
Յ), որոնք կրկնուելով կցուած են առանձին փորագրուած խաչերի¹⁰։ Լուսանկարում, սա-
կայն, երեւում է միայն երկու նուիրատուական խաչ։ Կարելի է ենթադրել, որ խաչերը
չորսն են եղել՝ ըստ հակիրճ յիշատակագրումների.

1. ՄԲ ԽԱՂԶ / ԲԱՐԵԽԱԻՍ Ե ԶՄԲ / ՄԲ ԽԱՂԶՍ ԲԱՐԵԽԱԻՍ Ե ԹԻՆ / Բ /// ԱՆԻՆ։

2. Երկրորդ արձանագրութիւնը բաւականին ընդարձակ նուիրատուական վի-
մագրի մի բեկոր է (Լուսանկարը տե՛ս ստորեւ).

ՍՍԱՓԱՆՈ իՆ ՏԱԻՆԻՆ / /// Ի ԲԵՐԱՔ ԱՇԽԱՏՈՒԹԵԱՄԲ / ԶԱԻՐՇԵՅԱՔ ՀԱՆԴԻՍԻԻՔ /
ԲԱՐԵՊԱԽՍ ԱՍԻ ՔՐԻՍՏՈՍ ՅԻՍՈՒՍ ՀԻ // ՈՐ /// ՈՐՔ ԵՐԿՐԱԳԵՔ ... :



Կարելի է կռահել, որ սուրբ Ստեփաննոսի տօնին խաչքար է կանգնեցուել
եւ օրհնուել հանդէսով՝ ի բարեխօսութիւն եւ ի երկրպագութիւն խաչի։ Հաւանա-
բար, «օրհնել» բառում Հ-ի փոխարէն, բարբառային արտասանութեանը համա-

⁹ Լուսանկարների տրամադրման համար շնորհակալ ենք ՀՀ ԳԱԱ Հնագիտութեան ու ազգագրութեան ինստի-
տուտի վիմագրութեան բաժնի աշխատակցունի՝ Կ. Ասատրեանին։

¹⁰ Վանքին կամ եկեղեցուն տրուող փոքր չափի նուիրատուութիւնները «արձանագրում» էին՝ եկեղեցու պատին
փորագրելով խաչաճանդակներ՝ աւելի յաճախ առանց որեւէ գրաւոր յիշատակ կամ վիմագիր թողնելու։

պատասխան՝ գրուել է Շ, որը նման է Ծ-ի: Լուսանկարում առկայ քարի հաստութիւնից կարելի է ենթադրել, որ այն պատուանդան է ծառայել բաւականին խոշոր մի խաչքարի համար, որի կորուստը, անշուշտ, ցաւալի է:

Սեդրակ Բարխուդարեանի արխիւում է գտնուում, հաւանաբար, նաեւ այն քարայրային եկեղեցու լուսանկարը, որտեղ պատսպարուել էր Վանական Վարդապետը՝ Զաւալեդդիւնի արշաւանքի ժամանակ: Լուսանկարը տե՛ս ստորեւ.



Ըստ ինձ ուղեկցող հետախույզների՝ աւելի վեր՝ ատրպէյճանական դիրքերին մօտ հատուածում է գտնուում երկու մատուռ, որոնցից մէկը հիմնայատակ աւերուել է թշնամու կողմից, եւ մի միջնադարեան գերեզմանոց, որի ուսումնասիրութիւնն այժմ անհնար է հասկանալի պատճառներով:

Խորանաշատի վանքը՝ միջնադարեան Արցախ-Ուտիքի խոշորագոյն կրօնական ու գիտական կեդրոններից մէկը, դեռ շատ ասելիքներ ունի աշխարհին, որոնք հնարաւոր կը դառնայ բացայայտել խաղաղութեան պայմաններում: Հակառակ դէպքում ցանկացած ուսումնասիրող իրեն վտանգի կ'ենթարկի՝ ամէն անգամ ատրպէյճանական դիպուկահարների կրակի տակ վանքն ուսումնասիրելու գնալով:

ՀԱՅԿ ՅԱԿՈԲԵԱՆ

Պ.գ.թ., Աւագ գիտաշխատող, ՀՀ ԳԱԱ Հնագիտութեան եւ ազգագրութեան ինստիտուտ, Մատենադարան. Երեւանի Մեսրոպ Մաշտոցի անուան հին ձեռագրերի ինստիտուտ, Հայ-սլաւոնական ուսման համալսարան, Արեւելագիտութեան ինստիտուտ, դասախօս